

Неделя о блудном сыне. Глас 2-й. Собор вселенских учителей и святителей Василия Великого, Григория Богослова и Иоанна Златоустого.

Слава Святей, и Единосущной, и Животворящей, и Нераздельней Троице всегда, ныне и присно и во веки веков. Аминь.

Приидите, поклонимся Цареве нашему Богу.

Приидите, поклонимся и припадем Христу, Цареве нашему Богу.

Приидите, поклонимся и припадем Самому Христу, Цареве и Богу нашему.

Приидите, поклонимся и припадем Ему.

Предначинательный псалом (103-й) (избранные стихи).

Благослови, душе моя, Господа! Благословен еси Господи!

Господи Боже мой, возвеличился еси зело. Благословен еси Господи!

Во исповедание и в велелепоту облеклся еси. Благословен еси Господи!

Творяй ангелы Своя духи и слуги Своя пламень огненный. Дивна дела Твоя, Господи!

На горах станут воды. Посреде гор пройдут воды. Дивна дела Твоя, Господи.

Вся премудростию сотворил еси. Слава Ти, Господи, сотворившему вся.

Слава Отцу, и Сыну, и Святому Духу, и ныне и присно и во веки веков. Аминь.

Аллилуиа, Аллилуиа, Аллилуиа, слава Тебе, Боже (трижды).

Великая ектения.

Миром Господу помолимся...

Стихословие кафизмы

Блажен муж, иже не иде на совет нечестивых.

Аллилуиа (трижды после каждого стиха).

Яко весть Господь путь праведных, и путь нечестивых погибнет.

Работайте Господеви со страхом, и радуйтесь Ему с трепетом.

Блажени вси надеющийся Нань.

Воскресни Господи, спаси мя, Боже мой.

Господне есть спасение, и на людех Твоих благословение Твое.

Слава, и ныне. Аллилуиа, Аллилуиа, Аллилуиа. Слава Тебе, Боже (трижды).

Малая ектения

Паки и паки миром Господу помолимся...

Стихиры на Господи воззвах

Глас 2. *Господи, воззвах к Тебе, услыши мя.*

Господи, воззвах к Тебе, услыши мя. Услыши мя Господи. Господи, воззвах к Тебе, услыши мя: вонми гласу моления моего, внемгда воззвати ми к Тебе. Услыши мя Господи.

Да исправится молитва моя, яко кадило пред Тобою, воздеяние руку моею, жертва вечерняя. Услыши мя Господи.

Воскресны стихиры

Стих: Изведи из темницы душу мою, исповедатися имени Твоему.

Прежде век от Отца Рождшемуся Божию Слову, Воплощшемуся от Девы Марии, приидите, поклонимся: крест бо претерпев, погребению предадешся, яко Сам восхоте: и воскресе из мертвых, спасе мя заблуждающего человека.

Стих: Мене ждут праведницы, дондеже воздаси мне.

Христос Спас наш, еже на ны рукописание пригвоздив на Кресте заглади, и смерную державу упраздни: поклоняемся Его Триневному Воскресению.

Стих: Из глубины воззвах к Тебе Господи, Господи, услыши глас мой.

Со Архангелы воспоем Христово Воскресение: Той бо есть Избавитель и Спас душ наших, и в славе страшней и крепцей силе, паки грядет судити миру, егоже созда.

Стихиры Троицы, глас 1

Стих: Да будут уши Твои, внемлюще гласу моления моего.

В безгрешную страну и животную вверихся, посеяв грех, серпом пожав класы лености, и рукоятием связав деяний моих снопы, яже и постлах не на гумне покаяния: но молю тя превечнаго делателя нашего Бога, ветром твоего любоблагоутробия развей плевую дел моих, и пшеницу даждь души моей оставление, в Небесную твою затворяя мя житницу, и спаси мя.

Стих: Аще беззакония назириши Господи, Господи, кто постоит Яко у Тебе очищение есть.

В безгрешную страну и животную вверихся, посеяв грех, серпом пожав класы лености, и рукоятием связав деяний моих снопы, яже и постлах не на гумне покаяния: но молю тя превечнаго делателя нашего Бога, ветром твоего любоблагоутробия развей плеву дел моих, и пшеницу даждь души моей оставление, в Небесную твою затворяя мя житницу, и спаси мя.

Стих: Имене ради Твоего потерпех Тя Господи, потерпе душа моя в слово Твое, упова душа моя на Господа.

Познаим братие, таинства силу, от греха бо ко отеческому дому востекшаго блуднаго сына преблагий отец предустрет лобзает, и паки своя славы познание дарует: и таинственное вышним совершает веселие, закалая тельца упитаннаго, да мы достойно сожителствуем, заклавшему же человеколюбному отцу и славному заклению, спасу душ наших.

Святителям, глас 4

Стих: От стражи утренняя до нощи, от стражи утренняя, да уповает Израиль на Господа.

Благодати органы, гусли духа, благознаменитыя трубы проповедания, страшныя и достослышанныя, с высоты шумящия грома, и славу Божию сказующия концем, три проповедники великия Троицы, Иоанна и Василиа достойно с Григорием прославим.

Стих: Яко у Господа милость, и многое у Него избавление, и Той избавит Израилья от всех беззаконий его.

Троицы поборницы, благочестия забрала, иже по дванадесятих трие апостоли, из едема точащия воду живущую реки, и лице земли животочными напаяющия Божественными струями, великия стихии, веру якоже тварь составльшия, достодолжно да почтутся.

Стих: Хвалите Господа вси языцы, похвалите Его вси людие.

Не суть речи, глаголет, ниже словеса глаголема, ихже не слышатся гласи их: во всю землю бо и море вещание протече Божественных и мудрых учителей, твари. отонудуже изряднейшия, тех Божественными законы содержатся и собираются во едино православие концы.

Стих: Яко утвердися милость Его на нас, и истина Господня пребывает во век.

Оганы Духа святаго, истинныя трубы, риторы слова, восхвалим песненными гласы, догматом их возследующии, молящися им яко дерзновение имущим ко Господу, даровати мир крепкий убо присно вселенней, нам же всем прощение.

Слава, Триоди, глас 2

О коликих благ окаянный себе лишихь! о какова царствия отпадох страстный азъ! богатство изнузив, еже приях заповедь преступих. увы мне, страстная душе! огню вечному прочее осудишися. темже прежде конца возопий Христу Богу яко блуднаго приими мя сына, Боже, и помилуй мя.

И ныне, глас 2, Догматик:

Прейде сень законная, благодати пришедши: якоже бо купина не сгараше опаляема: тако Дева родила еси, и Дева пребыла еси. Вместо столпа огненнаго, Праведное возсия Солнце: вместо Моисея, Христос, Спасение душ наших.

Вечерний вход

Премудрость. Прости.

Свете тихий святыя славы, Безсмертнаго, Отца Небеснаго, Святаго Блаженнаго, Иисусе Христе! Пришедше на запад солнца, видевши свет вечерний, поем Отца, Сына и Святаго Духа, Бога. Достоин еси во вся времена пет быти гласы преподобными, Сыне Божий, живот дай, темже мир Тя славит!

Вонмем.... Мир всем

И духови твоему.

Премудрость, вонмем, прокимен гл. 6, *Господь воцарися, в лепоту облечеса.*

Стих: Облечеса Господь в силу и препоясая.

Стих: Ибо утверди вселенную, яже не подвижится.

Стих: Дому Твоему подобае святыня, Господи, в долготу дний.

Чтения паремий святителям

Второго закона чтение.(глава 1):

Во днех оных, рече моисей к сыном Израилевым: видите, предах пред лицом вашим землю, вшедше наследуйте ю, еуже клятеся Господь отцем вашим, аврааму, и исааку, и иакову дати им, и семени их по ним. И рекох к вам во время оно, глаголя: не возмогу един водити вас. Господь Бог ваш умножил вы ест, и се есте днесь яко звезды Небесныя множеством. Господь Бог отец наших да приложит вам, яко да будете тысящами сугубо, и да благословит вас, якоже глагола вам. И взях от вас мужи мудры и художны, и смысленны, и поставих их владети над вами, тысященачальники, и стоначальники, и пятьдесятоначальники, и десятоначальники, и письмоводители судиям вашим, и заповедах судиям вашим во время оно, глаголя: разслушайте посреде братий ваших, и судите праведно, посреде мужа, и посреде брата его, и посреде пришельца его. Да не познаете лица в суде, малому и великому судиши, и не устыдишися лица человеческого, яко суд Божий ест.

Второго закона чтение.(глава 8):

Во днех оных, рече моисей к сыном Израилевым: се Господа Бога твоего небо, и небо небесе, земля и вся елика суть на ней. обаче отцы ваши произволи Господь любити их: и избра семя их по ним, вас паче всех язык, в день сей. И обрежете жестосердие ваше, и выя ваша не ожесточите ктому. Ибо Господь Бог ваш, сей Бог богов, и Господь господей: Бог великий, и крепкий, и страшный, иже не дивится лицу, ниже возьмет дар. Творяй суд пришельцу, и сиру, и вдовице, и любит (с. 625) пришельца, дати ему хлеб и ризу. И возлюбите пришельца, пришельцы бо бесте в земли египетстей. Господа Бога твоего да убоишися, и тому единому послужиши, и к нему прилепишися, и именем его кленешися. Той хвала твоя, и той Бог твой, иже сотворил ти ест великая и славная сия, яже видесте очи твои.

Премудрости Соломона чтение (глава 3):

Праведных души в руце Божией, и не прикоснется их мука. Непщевани быша во очесех безумных умрети, и вменися озлобление исход их: И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено: И в мале наказани бывше, великими благодетельствовани будут, яко Бог искуси я, и обрете их достойны себе. яко злато в горниле искуси их, и яко всеплодие жертвенное прият я. И во время посещения их возсияют: и яко искры по стеблию потекут. Судят языком, и обладают людьми, и воцарится Господь в них во веки. Надеющиися нань разумеют истину, и вернии в любви пребудут ему. яко благодать и милость в преподобных его, и посещение во избранных его.

Сугубая ектения

Рцем вси от всея души, и от всего помышления нашего рцем...

Сподоби, Господи, в вечер сей без греха сохранится нам. Благословен еси, Господи Боже отец наших, и хвально и прославлено имя Твое во веки, аминь. Буди, Господи, милость Твоя на нас, якоже уповахом на Тя. Благословен еси, Господи, научи мя оправданием Твоим. Благословен еси, Владыко, вразуми мя оправданием Твоим. Благословен еси, Святыи, просвети мя оправданием Твоим, Господи, милость Твоя во век; дел руку Твоею не презри. Тебе подобае хвала. Тебе подобае пение, Тебе слава подобае, Отцу и Сыну и Святому Духу, ныне и присно и во веки веков. Аминь.

Просительная ектения.

Исполним вечернюю молитву нашу Господеви...

На стиховне стихиры воскресные, глас 2-й:

Воскресение Твое, Христе Спасе, всю просвети вселенную, и призвал еси Твое создание: Всесильне Господи, слава Тебе.

Стих: Господь воцарися, в лепоту облечеса.

Древом, Спасе, упразднил еси, юже от древа клятву, державу смерти погребением Твоим умертвил еси, просветил же еси род наш востанием Твоим. Темже вопием Тебе: Животодавче Христе Боже наш, слава Тебе.

Стих: Ибо утверди вселенную, яже не подвижется.

На кресте явлься, Христе, пригвождаемь, изменил еси доброту зданий: и безчеловечие убо воины показующе, копием ребра Твоя прободоша, евреи же печатати гроба просиша, Твоя власти не вдуше. Но за милосердие утроб Твоих, приемый погребение, и тридневен воскресый Господи, слава Тебе.

Стих: Дому Твоему подобае святыня, Господи, в долготу дний.

Животодавче Христе, волею страсть претерпевый смертных ради, во ад же снизшед яко силен, тамо Твоего пришествия ожидающия, исхитив яко от зверя крепкаго, рай вместо ада жити даровал еси. Темже и нам славящим тридневное Твое востание, даруй очищение грехов, и велию милость.

Слава, святителей, глас 2

Днесь души земнородных возносятся от земных, днесь небесныя бывають в памяти святых: ибо врата Небесная возьмлются, и нам Владычняя сказуема бывають, слова

слова проповедают, и языки чудеса поют. мы же ко спасу возопием: слава тебе, Христе Боже, верным бо мир теми бысть.

И ныне, глас 6 Триоди

Отеческаго дара расточив богатство, с безсловесными скоты пасохся окаянный, и тех желая пищи, гладом таях не насыщаяся, но возвратився к благоутробному отцу, взываю со слезами: прими мя яко наемника припадающа человеколюбию твоему и спаси мя.

Ныне отпускаеши раба Твоего, Владыко, по глаголу Твоему с миром: яко видеста очи мои спасение Твое, еже еси уготовал пред лицом всех людей, свет во откровение языков, и славу людей Твоих Израиля.

Святый Боже, Святый Крепкий, Святый Безсмертный, помилуй нас (трижды).

Слава Отцу и Сыну и Святому Духу, и ныне и присно и во веки веков. Аминь.

Пресвятая Троице, помилуй нас; Господи, очисти грехи наша; Владыко, прости беззакония наша; Святый, посети и исцели немощи наша, имене Твоего ради. Господи, помилуй (трижды).

Слава Отцу и Сыну и Святому Духу, и ныне и присно и во веки веков. Аминь.

Отче наш, Иже еси на небесех! Да святится имя Твое, да придет Царствие Твое, да будет воля Твоя, яко на небеси и на земли. Хлеб наш насущный даждь нам днесь; и остави нам долги наша, яко же и мы оставляем должником нашим; и не введи нас во искушение, но избави нас от лукаваго.

Яко Твое есть Царство, и сила, и слава, Отца и Сына и Святаго Духа, ныне и присно и во веки веков. Аминь.

Отпустительный тропарь:

Богородице, Дево, радуйся, Благодатная Марие, Господь с Тобою; благословенна Ты в женах и благословен Плод чрева Твоего, яко Спаса родила еси душ наших (дважды).

Тропарь святителей, глас 4-й:

Яко апостолов единомыслии, и вселенных учителей, Владыку всех молит, мир вселенной даровати, и душам нашим велию милость.

Буди имя Господне благословенно от ныне и до века (трижды)..

33-й псалом

Благословлю Господа на всякое время, выну хвала Его во устех моих.

О Господе похвалится душа моя: да услышат кротции и возвеселятся.

Возвеличите Господа со мною, и вознесем имя Его вкупе.

Взысках Господа, и услыша мя, и от всех скорбей моих избави мя.

Приступите к Нему, и просветитесь, и лица ваша не постыдятся.

Сей нищий воззва, и Господь услышай, и от всех скорбей Его спасе и.

Ополчится Ангел Господень окрест боящихся Его, и избавит их.

Вкусите и видите, яко благ Господь: блажен муж, иже уповае на Нань.

Бойтесь Господа вси святии Его, яко несть лишения боящимся Его.

Богатии обнищаша и взыскаша: взыскающии же Господа не лишатся всякаго блага.

Благословение Господне на вас, Того благодатию и человеколюбием, всегда, ныне и присно и во веки веков. Аминь.

УТРЕНЯ (в составе всенощного бдения)

Слава в вышних Богу, и на земли мир, в человецех благоволение (трижды).

Господи! устне мои отверзеши, и уста моя возвестят хвалу Твою (дважды).

Шестопсалмие.

Псалом 3-й

Господи, что ся умножиша стужающии ми! мнози встают на мя; ...

Псалом 37-й

Господи! да не яростию Твоею обличиши мене, ниже гневом Твоим накажеш мене:...

Псалом 62-й

Боже, Боже мой! к Тебе утреннюю; возжада Тебе душа моя, ...

Слава Отцу и Сыну и Святому Духу, и ныне, и присно, и во веки веков, аминь.

Аллилуиа, Аллилуиа, Аллилуиа, слава Тебе, Боже (трижды - без поклонов).

Псалом 87-й

Господи, Боже спасения моего! во дни воззвах, и в нощи пред Тобою...

Псалом 102-й

Благослови, душе моя, Господа, и вся внутренняя моя, имя святое Его! Благослови, душе моя, Господа, и не забывай всех воздаяний Его! ...

Псалом 142-й

Господи! услыши молитву мою, внуши моление мое во истине Твоей,...

Слава Отцу и Сыну и Святому Духу, и ныне и присно и во веки веков; аминь. Аллилуиа, Аллилуиа, Аллилуиа, слава Тебе, Боже (трижды).

Великая ектения

Миром Господу помолимся...

Бог Господь

Бог Господь и явился нам, благословен Грядый во имя Господне.

Стих: Исповедайтесь Господеви, яко благ, яко в век милость Его.

Стих: Обышедше обыдоша мя, и именем Господним противляхся им.

Стих: Не умру, но жив буду, и повем дела Господня.

Стих: Камень, его же не брегоша зиждущий, сей бысть во главу угла, от Господа бысть сей и есть дивен во очесех наших.

Тропарь воскресный, глас 2-й

Егда снизшел еси к смерти, Животе Безсмертный, тогда ад умертвил еси блистанием Божества. Егда же и умершья от преисподних воскресил еси, вся Силы Небесныя взываху: Жизнодавче, Христе Боже наш, слава Тебе. (дважды)

Слава, святителей, глас 4:

Яко апостолов единомыслии, и вселенныя учителие, Владыку всех молите, мир вселенней даровати, и душам нашим велию милость.

И ныне, глас 4, Богородичен:

Еже от века утаеное и Ангелом несведомое таинство, Тобою, Богородице, сущим на земли явился Бог, в неслитном соединении воплощаемь, и Крест волею нас ради восприим, имже воскресив первозданнаго, спасе от смерти души наша.

Чтение кафизм

**Господи помилуй Зр., Слава,
И ныне... читает кафизму в 3 Славы**

Малая ектения,

Паки и паки миром Господу помолимся...

По 1-м стихословии, седальны воскресны, глас 2:

Благообразный Иосиф, с древа снем Пречистое Твое тело, плащаницею чистою обвив, и благоуханьи во гробе нове закрыв положи, но тридневен воскресл еси, Господи, подая миру велию милость.

Стих: Воскреси Господи Боже мой, да вознесется рука Твоя, не забуди убогих Твоих до конца.

Мироносицам женам при гробе представ Ангел вопиаше: мира мертвым суть прилична, Христос же истления явился чуждь. Но возопийте: воскресе Господь, подая миру велию милость.

Слава, и ныне, Богородичен:

Препрославленна еси, Богородице Дево, поем Тя: Крестом бо Сына Твоего низложися ад, и смерть умертвися, умерщвлении востахом, и живота сподобихомся: рай восприяхом древнее наслаждение. Тем благодаряще, славословим, яко Державнаго, Христа Бога нашего, и Единого Многомилостиваго.

Господи помилуй Зр., Слава, И ныне... читает кафизму в 3 Славы

Малая ектения,

Паки и паки миром Господу помолимся...

По 2-м стихословии седальны воскресны, глас 2

Камень гробный запечатати не возбранив, камень веры воскрес подал еси всем, Господи, слава Тебе.

Стих: Исповемся Тебе Господи всем сердцем моим, повем вся чудеса Твоя.

Учеников Твоих лик с мироносицами женами радуется согласно: общий бо праздник с ними празднуют, в славу и честь Твоего Воскресения. И теми вопием Ти, Человеколюбче Господи: людем Твоим подаждь велию милость.

Слава, и ныне, Богородичен:

Преблагословена еси, Богородице Дево, Воплощшим бо ся из Тебе ад пленися, Адам воззвася, клятва потребися, Ева свободися, смерть умертвися, и мы ожихом. Тем воспевающе вопием: благословен Христос Бог, благоволивый тако, слава Тебе.

Полиелей

Хвалите имя Господне, хвалите раби Господа. Аллилуиа (трижды).

Благословен Господь от Сиона, живой во Иерусалиме. Аллилуиа (трижды).

Исповедайтесь Господеви, яко благ, яко в век милость Его. Аллилуиа (трижды).

Исповедайтесь Богу небесному, яко в век милость Его. Аллилуиа (трижды).

Псалом 136

На реках Вавилонских, тамо седохом и плакахом, внемди помянути нам Сиона. На вербиих посреде его обесихом органы наша. Яко тамо вопросиша ны пленшии нас о словесех песней и ведши нас о пении: воспойте нам от песней Сионских. Какое воспоем песнь Господню на земле чуждей? Аще забуду тебе, Иерусалиме, забвена буди десница моя. Прильпни язык мой гортани моему, аще не помяну тебе, аще не предложу Иерусалима, яко в начале веселия моего. Помяни, Господи, сыны Едомския, в день Иерусалимль глаголющия: истощайте, истощайте до основания его. Дщи Вавилоня окаянная, блажен иже воздаст тебе воздаяние твое, еже воздала еси нам. Блажен иже имет и разбьет младенцы Твоя о камень.

Воскресные тропари святого Иоанна Дамаскина:

Благословен еси, Господи, научи мя оправданием Твоим

Ангельский собор удивися, зря Тебе в мертвых вменившася, смертную же, Спасе, крепость разоривша, и с Собою Адама воздвигша, и от ада вся свободша.

Благословен еси, Господи, научи мя оправданием Твоим

Почто мира с милостивными слезами, о ученицы, растворяете Блистаяйся во гробе Ангел мироносицам вещаше: видите вы гроб и уразумейте: Спас бо воскрес от гроба.

Благословен еси, Господи, научи мя оправданием Твоим

Зело рано мироносицы течаху ко гробу Твоему рыдающыя, но предста к ним Ангел и рече: рыдания время преста, не плачите, воскресение же апостолом рцйте.

Благословен еси, Господи, научи мя оправданием Твоим

Мироносицы жены с миры пришедшия ко гробу Твоему, Спасе, рыдаху, Ангел же к ним рече, глаголя: что с мертвыми живаго помышляете Яко Бог бо, воскрес от гроба.

Слава Отцу и Сыну и Святому Духу.

Поклонимся Отцу и Его Сынови, и Святому Духу, Святей Троице во едином существе, с Серафимы зовуще: Свят, Свят, Свят еси, Господи.

И ныне и присно и во веки веков, аминь.

Жизнодавца рождши, греха, Дево, Адама избавила еси, радость же Еве в печали место подала еси, падшия же от жизни к сей направи из Тебе воплотивыися Бог и Человек.

Аллилуиа, Аллилуиа, Аллилуиа, слава Тебе, Боже (трижды).

Малая ектения

Паки и паки миром Господу помолимся...

Ипакои, глас 2

По страсти шедша во гроб жены, во еже помазати тело Твое, Христе Боже, видеша ангелы во гробе, и ужасошася: глас бо слышаху от них, яко воскрес Господь,

даруя миру велию милость.

Седален святителей, глас 5

Яко царское украшение церкви, Василиа вси восхвалим, догматов сокровище неоскудеемо: сими бо сам наказа нас Троицу чествовати святую, соединену убо существом, разделену же ипостасьми.

Ин седален святителей, глас 4

Светильницы пресветлии церкви Христовы, мир просветисте ученьми вашими, отцы Богомудрии, изсушивше ереси всех злославных, и угасивше пламеновидная хульных смущения. темже, яко святителие Христовы, молитесь спастися нам.

Ин седален святителей, глас 3

Столп был еси церкви, богатство некрадомое благочестия явился еси, Богослове Григорие, в безстрастии осиял еси житие твое, и Троическаия изъяснил еси догматы, Отче преподобне, Христа Бога моли о спасении душ наших.

Ин седален святителей, глас 4

Во цветнице писаний, якоже пчелы мудрыя прилетающе вы объясте добре, и от цветов изряднейшая, и мед всем верным учений ваших представисте вкупе во все-наслаждение их: и сего ради всяк наслаждайся с веселием зовет: предстаните паки и по смерти, иже вас восхваляющим, блаженнии.

Ин седален святителей, глас 4

Премудрии учителяе вселенная, иже Бога прославльшии дела и словеса на земли, да возвеличатся днесь, яко спасения нам суще ходатаи.

Слава, ин седален святителей, глас 4

Празднует днесь церковь честное торжество учителей триех: ибо тии утвердиша церковь Божественными своими догматы.

И ныне, Богородичен

Предстательнице неборимая оскорбляемых, и теплое заступление уповающих на тя, от бед мя избави: ты бо еси всех помощница.

Степенна, глас 2

Антифон 1

На небо очи пуцаю моего сердца, к Тебе, Спасе, спаси мя Твоим осиянием.

Помилуй нас согрешающих Тебе много, на всякий час, о Христе мой, и даждь образ прежде конца покаяться Тебе.

Слава: Святому Духу, Еже царствовати подобает, освящати, подвизати тварь: Бог бо есть, Единосущен Отцу и Слову.

И ныне, тойже.

Антифон 2:

Аще не Господь бы был в нас, кто доволен цел сохранен быти от врага, купно и человекоубийцы

Зубом их не предаждь, Спасе, Твоего раба: ибо львовым образом на мя подвизаются врази мои.

Слава: Святому Духу живоначалие и честь: вся бо созданная, яко Бог сый силою, соблюдает во Отце, Сыном же.

И ныне, тойже.

Антифон 3:

Надеющиеся на Господа, уподобишася горе святей: иже никакоже движутся прилоги вражиими.

В беззаконии рук своих да не прострут божественне живущии: не оставляет бо Христос жезла на жребии Своем.

Слава: Святым Духом точится всяка премудрость: отсюда благодать апостолом, и страдальчества венчаются мученицы, и пророцы зрят.

И ныне, тойже.

Прокимен, глас 2: Востани, Господи, Боже мой, повелением, имже заповедал еси, и сонм людей обыдет Тя.

Стих: Господи Боже мой, на Тя уповах, спаси мя.

Господу помолимся — **Господи помилуй**— Яко Свят еси Боже наш... **Аминь.**

Всякое дыхание да хвалит Господа.

Стих: Хвалите Бога во святых Его:

И о сподобитися нам слышанию Святаго Евангелия Господа Бога молим — **Господи помилуй**

Зр

Мир всем - И духови твоему.

От (Матфея или Марка или...) Святаго Евангелия чтение Слава Тебе, Господи, слава Тебе.

Чтение Евангелия.

Слава Тебе, Господи, слава Тебе.

Воскресение Христово видевше, поклонимся Святому Господу Иисусу, единому безгрешному. Кресту Твоему поклоняемся, Христе, и святое Воскресение Твое поем и славим: Ты бо еси Бог наш, разве Тебе иного не знаем, имя Твое именуем. Приидите вси вернии, поклонимся Святому Христову Воскресению: се бо прииде крестом радость всему миру, всегда благословяще Господа, поем Воскресение Его: распятие бо претерпев, смертью смерть разруши.

50 псалом (чтец)

Слава Отцу и Сыну и Святому Духу. Покаяния отверзи ми двери жизнедавче, утренюет бо дух мой ко храму святому твоему, храм носяй телесный весь осквернен: но яко щедр, очисти благоутробною твоею милостию

И ныне и присно и во веки веков, аминь. На спасения стези настави мя Богородице, студными бо окалях душу грехми, и в лености все житие мое иждих: но твоими молитвами избави мя от всякия нечистоты.

Помилуй мя, Боже, по велицей милости Твоей и по множеству щедрот Твоих очисти беззаконие мое!

Множества содеянных мною лютых, помышляя окаянный, трепещу страшнаго дне суднаго: но надеяся на милость благоутробия твоего, яко давид вопию ти: помилуй мя Боже по велицей твоей милости.

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая; молитвами Всепречистыя Владычицы нашея Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго пророка, Предтечи и Крестителя Иоанна, святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мирликийских, чудотворца: святых равноапостольных Мефодия и Кирилла, учителей Словенских: святаго равноапостольнаго великаго князя Владимира: иже во святых отец наших всея России чудотворцев, Михаила, Петра, Алексия, Ионы, Филиппа и Ермогена: святых славных и добропобедных мучеников, преподобных и богоносных отец наших, святых и праведных Богоотец Иоакима и Анны (и святаго, имя рек, егоже есть храм и егоже есть день) и всех святых: молим Тя, многомилостиво Господи, услыши нас, грешных, молящихся Тебе, и помилуй нас.

Господи, помилуй (12 раз).

Милостию, и щедротами, и человеколюбием Единороднаго Твоего Сына, с Ним же благословен еси, со Всесвятым и Благим и Животворящим Твоим Духом, ныне и присно и во веки веков. — **Аминь.**

*Канон воскресный. Глас 2
Песнь 1*

Ирмос: Во глубине постла иногда фараонитское всевоинство преоруженная сила; воплощсея же Слово всезлобный грех потребило есть, препрославленный Господь, славно бо прославися.

Мирский князь Блаже, емуже написахомся, заповеди Твоя не послушавше, крестом Твоим осудися: приразися бо Ти яко смертну: отпаде же власти Твоя державою, и немощный обличися.

Избавитель рода человеческого, и нетленному животу Начальник в мир пришел еси: Воскресением бо Твоим раздрал еси смертныя пелены, Еже славословим вси: славно бо прославися.

Богородичен: Превышши явилася еси, Чистая Приснодево, всякия невидимыя же и видимыя твари: Зиждителя бо родила еси, яко благоволи воплотитися во утробе Твоей, Егоже со дерзновением моли, спасти души наша.

Ин канон Пресвятей Богородице

Невещественная древле лествица, и странно оледеневший путь моря, Твое являше Рождество, Чистая, еже поем вси: яко прославися.

Сила Вышняго, Ипостась Совершенная, Божия Мудрость, воплощися, Пречистая, из Тебе, к человеку беседова: яко прославися.

Ин канон Триоди Глас 2

Иисусе Боже, каюшася приими ныне и мене, яко блуднаго сына, все житие в лености живша, и тебе прогнававши.

Еже ми дал еси прежде, зле расточих Божественное богатство, удалихся от тебе, блудно жив: благоутробне отче, приими убо и мене обращающася.

Объятия ныне отеческая простер, приими Господи и мене, якоже блуднаго, всещедре, яко да благодарно прославлю тя.

Богородичен: На мне Боже, всю показав благостыню, презри моих множество согрешений, яко благодетель, Божественными Матере твоя мольбами.

Ин канон святителей Глас 8

Кое благодарение, кое противовоздаяние подобающее нашим, человецы, принесетя от нас благодетелем, имиже, ко еже добре быти, наставляемся.

Витийстии языцы, и хитрости, и коварства, и вся словес сила, ныне в вину да сподвигнутся едины, и чествующе взаим да почтут.

Не человеческого тщания исправление сие начинание: но твоему престолу приседящая, человеколюбче, премудрость да споспешествует ми, слова благодать дающи, еюже прославити возмогу, ихже сама добре предпрослави.

Богородичен: Память праведных, Богомудрое сословие с похвалами совершает: с нимиже и Божия Матерь, яко тех глава, в лепоту прославляется, конечный и первый, и средний чин содержащи, и благохваления причащающися.

Катавасия: Сушу глубородительную землю солнце нашествова иногда, яко стена бо огусте обаполы вода, людем пешемореходящим и Богоугодно поющим: поим Господеви, славно бо прославися.

Песнь 3

Ирмос: Процвела есть пустыня, яко крин, Господи, языческая неплодящая церковь, пришествием Твоим, в нейже утвердися мое сердце.

Тварь в страсти Твоей изменяшася, зрящи Тя в нищетне образе от беззаконных поругаема, основавшего вся Божественным мановением.

От персти по образу мя рукою Твоею создал еси: и сокрушенна паки в персть смертную за грех, Христе сошед во ад, совоскресил еси.

Богородичен: Чини удивишася ангельстии, Пречистая, и человеческая устрашишася сердца о Рождестве Твоем: темже Тя, Богородицу, верую чтим.

Ин

Иже времени превышший всякаго, яко временем Творец, из Тебе, Дево, волею Младенец создася.

Чрево пространнейшее небес воспоем, имже Адам на небесех радуяся, живет.

Ин

Весь вне быв себе, умовредно прилепихся страстей обретателем: но приими мя Христе, якоже блуднаго.

Блуднаго гласу поревновав, вопию: согреших, отче, якоже онаго убо, и мене обыми ныне, и не отрини мене.

Объятия твоя простер Христе, милостивно прими мя, от страны дальних грехов и страстей обращающаяся.

Богородичен: **Добрая в женах, обогати и мене добрых видов, грехи многими обнищавшаго чистая, яко да славлю тя.**

Ин

Труба великая церкви, светильник, просвещающая вселенную, проповедник, вещанием объемляя вся концы, великоименитый Василий сподвизает собрание сие.

Светел от жития и вещей, светел от словес и учений, во всех пресиявая паче всех, якоже другое паче звезд солнце, многопетый Богослов днесь блажится.

Дух Божий исполни василиа художества: огненных же имяше языков един Григорий, и огнем высокоречия дхне: Христова же уста во иоанне глаголаху.

Богородичен: **Во утробе чистыя Девы вселивыйся, души Богоносных святых жилище творит, и оных устами еже о Матери сказует таинство.**

Катавасиа: **Сушу глубородительную землю солнце нашествова иногда, яко стена бо огусте обаполы вода, людем пешемореходящим и Богоугодно поющим: поим Господеви, славно бо прославися.**

Малая ектения.

Паки и паки миром Господу помолимся...

Кондак святителей, глас 2

Священныя и Боговещанныя проповедники, верх учителей, Господи, приял еси в наслаждение благих твоих и упокоение: труды бо оных и смерть приял еси паче всякаго всеплодия, едине прославляя святых твоих.

Икос

Кто доволен своя устне разверзти, и подвигнути язык к дышущим огнем силою слова и духа обаче толико рещи дерзну: яко все преидоша человеческое естество сии трие, многими и великими дарованьи, деянием же и видением, по обоим светлы превозшедше. темже зело великих даров твоя сподобил еси, яко верныя твоя служители, едине прославляя святых твоих.

Седален святителей,, глас 8

Великия светильники светозарныя, церкви столпы неразоримыя согласно да восхвалим, иже добрых наслаждающися, и словес тех, купно и благодати, премудраго златолаголива, и великаго Василиа, с Григорием светлым Богословом: к нимже и возопиим от сердца зовуще: святителие тревеличайшии, молитесь Христу Богу, прегрешений оставление даровати празднующим любовию святыю память вашу.

Слава, ин Седален святителей, глас 8

Премудрость приемше от Бога, яко апостоли инии трие Христовы, словом разума составляете догматы, яже прежде словесы простыми низлагаху, рыбарие в разуме силою Духа: подобаше бо тако простей нашей вере составление стяжати. отнюдуже вси вопиим вам: молитесь Христу Богу, прегрешений оставление даровати празднующим любовию святыю память вашу.

И ныне, Седален Триоди, глас 1

объятия отча отверсти ми потщися, блудно иждих мое житие, на богатство не иждиваемое взираяй щедрот твоих спасе, ныне обнищавшее мое сердце не презри. тебе бо Господи, во умилении зову: согреших, отче, на Небо и пред тобою.

Песнь 4

Ирмос: **Пришел еси от Девы, не ходатай, ни Ангел, но Сам, Господи, воплощься, и спасл еси всего мя человека. Тем зову Ти: слава силе Твоей, Господи.**

Предстоиши судищу яко судимь, Боже мой, не вопия Владыко, суд износя языком: имже страстию Твоею, Христе вселенней соделал еси Спасение.

Страстию Твоею, Христе, врагу оскудеша оружия, противным же еже во ад схождением Твоим, грады разрушишася, и мучителя дерзость низложена бысть.

Богородичен: **Тя пристанище спасения, и стену недвижиму, Богородице Владычице, вси вернии свемы: Ты бо молитвами Твоими избавляеши от бед души наша.**

Ии

Се превознеся Божественная Гора дому Господня, превышше сил, Богоматерь явственнейше.

Законов естественных кроме, Едина Дево рождши владычествуящаго тварию, сподобилася еси Божественнаго звания.

Ии

Богатство благих, еже дал ми еси Небесный отче, расточих зле, странным гражданам порабощен. темже вопию ти: согреших ти, прими мя яко блуднаго древле, простер объятия мне твоя.

Всякой злобе поработихся, приникнув окаянно страстей делателем, и себе вне бых несмотрением, ущедрь мя спасе, преНебесный отче, прибегающа ко многим твоим щедротам.

Всякаго стыда исполнихся, не смея воззрети на высоту Небесную: ибо безсловесно приникнув греху, ныне же обращаю вопию умилением: согреших ти, прими мя всецарю.

Богородичен: Человеком помощи, упование твердое всем Христианом, прибежище чистая спасаемым: спаси мя Дево, Матерними твоими мольбами, и будущия жизни сподоби.

Ии

Разумливы от нижня мудрости бывше, правление преславнии от Божественныя стяжасте: темже яко рабыню сию оной всемудре покористе.

Любомудрии, мудрыя аще любите, умудритесь, и глаголати научитесь вси, иже словесем чудящихся, деяния опасству и видения оттуду обучающесе.

Столп огнен людем верным предваряющий, и опаляющий враги веры, племена же спасаяй известно последующия, великий явился Василий, да дерзает и побеждает Христова церковь, толиким обогатавшись поборником.

Богородичен: Естество просто стерпевшее сложению, и явльшееся вышше слития в твоём, Владычице, Сыне, трие Богоноснии учителя исповедаша, от двою волю и сугубаго действия сугуба по естеству проповедавшие.

Катавасиа: Покрыла есть Небеса добродетель твоя, Христе. из кивота бо прошед, святыни твоя нетленные Матере, в храме славы твоя явился еси, яко младенец руконосимь и исполнишася вся твоего хваления.

Песнь 5

Ирмос: Ходатай Богу и человеком был еси, Христе Боже; Тобою, бо Владыко, к Светоначальнику, Отцу Твоему, от ноши неведения приведение имамы.

Яко кедры, Христе, языков шатание сокрушил еси волею, Владыко: яко изволил еси на кипарисе, и на певке, и кедре, плотию совозвышаемь.

В рове, Христе, преисподнем положиша Тя бездыханна мертва: но Твоею язвою забвенныя мертвыя, иже во гробех спящия, уязвен с Собою воскресил еси.

Богородичен: Моли Сына Твоего и Господа, Дево Чистая, на Тя уповающим мир даровати, плененным избавление, от сопротивных настояний.

Ии

Облацы веселия сладость кропите сущим на земли: яко Отроча дадесе, Иже сый прежде век, от Девы воплощься Бог наш.

Житию и плоти моей свет возсия, и дряхлость греха разруши: напоследок от Девы без семене воплощься Вышний.

Ии

Поработихся гражданином странным, и в страну тлетворную отидох, и исполнихся стыда: ныне же обращаю зову ти щедре, согреших.

Отечская твоя благоутробия ныне отверзи ми, от злых обратившуся, Небесный отче, и не отрини мене, имеяй премногую милость.

Не смею воззрети горе на высоту, без числа Христе прогневав тя: но ведый твоя щедроты милостивныя, взываю: согреших ти, очисти, и спаси мя.

Богородичен: Всесвятая Дево благодатная, очищение всем рождшая, моих согрешений тяжкое бремя твоими молитвами облегчи.

Ии

Ты источник твоих дарований испити весьма, человеколюбче, дал еси святым, умален никакоже истощанием, мир же весь упоив, иже от чрева их Божественными потоки.

Что ми злато что ми богатство и слава, и могутство дымове расходящийся по воздуху: вся да исчезнут, вся да преносит ветер. Мне богатство едино многорачительно учителей троица витийствующая.

Иже Божественных вещей и человеческих мудрыя хитрецы, иже сущих естества любоистинне яве нам известившия, и зиждителя тех всем сказавшия яко лепо, благодарными гласы восхвалим.

Богородичен: Безсмертное естество смертное претече во святыню, и Дева отроковица безплотныя ангелы превзыде, яко Бога рождшая, царя ангельскаго, на негоже зрети онем невозможно.

Катавасиа: Яко виде Исаиа образно на престоле превознесена Бога, от ангел (с. 36) славы дориносима, о окаянный, вопияше, аз провидех бо воплощаема Бога, света невечерня и миром владычествующа.

Песнь 6

Ирмос: В бездне греховней валяясь, неизследную милосердия Твоего призываю бездну: от тли Боже, мя возведи.

Яко злодей Праведник осудися и со беззаконными на древе пригвоздися, повинным оставление Своею даруя кровию.

Единем убо человеком, первым Адамом древле в мир вниде смерть, и Единем Воскресение Сыном Божиим явися.

Богородичен: Неискусомужно, Дево, родила еси, и вечнуеши Дева, являющи Истиннаго Божества, Сына и Бога Твоего образы.

Ии

Естество человеческое работающее греху, Владычице Чистая, Тобою свободу улучи: Твой бо Сын, яко агнец, за всех закалается.

Вопием Ти вси, истинней Богоматери, прогневавшия рабы избави: Едина бо дерзновение к Сыну имаши.

Ии

Глубина согрешений содержит мя присно, и треволнение грехов погружает мя: окорми мя ко пристанищу жизни, Христе Боже, и спаси мя царю славы.

Богатство отеческое расточих люте, и обнищав студа исполнихся, поработен неплодными помышленьми. темже ти вопию: человеколюбче ущебри, и спаси мя.

Гладом истаявша всяких благ, и устранившася от тебе всеблагий, ущебри обращающаяся мя ныне: и спаси Христе, поюща твое человеколюбие.

Богородичен: Спаса и Владыку рождшая Христа, спасения мя отроковице сподоби, обнищавша от всяких благ, Дево чистая, да пою твоя величия.

Ии

Свойства в Троице три сБогословите: нерождение Отца, слова же рождение, и Духа исхождение самаго.

Днесь дому сему светоявленное спасение: два бо и три собранныя Христос во имя свое почествуяй, посреде присутствует сих.

Троицу единственную Богословити научихомся, единицу Троичную пети прияхом: поклонятися навыхом от отцев единому естеству триипостасному.

Богородичен: Безматерний прежде плоти, безотчий же по воплощении, Сын Отчий

и Матерний, иже сия нарицай, паче ума обоя: Богу бо подобает чудес преславная.

Катавасиа: Возопи к тебе видев старец очима спасение, еже людем прииде от Бога, Христе, ты Бог мой.

Малая ектения.

Паки и паки миром Господу помолимся...

Кондак Триоди, глас 3

Отеческия славы твоя удалихся безумно, в злых расточив еже ми предал еси богатство. темже ти блуднаго глас приношу: согреших пред тобою отче щедрый, приими мя кающася, и сотвори мя яко единого от наемник твоих.

Икос:

Спасу нашему на всяк день учащу своим гласом, писания услышим о блудном, и целомудренном паки. и сего верою подражаем доброе покаяние, ведущему тайная всех, смирением сердца воззовем согрешихом ти отче щедрый, и никогдаже достойни есмы нарещися чада, якоже прежде. но яко естеством сый человеколюбив, ты приими, и сотвори мя яко единого от наемник твоих.

Песнь 7

Ирмос: Богопротивное веление беззаконнующаго мучителя высок пламень вознесло есть; Христос же простре Богочестивым отроком росу духовную, Сый благословен и препрославлен.

Не терпел еси, Владыко, за благоутробие смертию человека зрети мучима, но пришел и спасл еси Твоею кровию, человек быв: Сый благословен и Препрославлен, Бог отец наших.

Видевше Тя, Христе, оболчена во одежду отмщения, ужасошася вратницы адовы: безумнаго бо мучителя раба, Владыко, пришел еси убити: Сый благословен и Препрославлен, Бог отец наших.

Богородичен: Святых Святейшую Тя разумеем, яко Едину рождшую Бога Непременнаго, Дево Нескверная, Мати Безневестная: всем бо верным источила еси нетление, Божественным Рождеством Твоим.

Ии

Зряще в нощи убо Иаков, яко в гадании Бога воплощенна, из Тебе же светлостию явился поющим: Пребожественный отцев Бог, и Препрославлен.

Знамения яже в Тебе, неизреченнаго проявляя снятия, со Иаковым борется: имже волею соединиися человеком, Чистая: Пребожественный отцев Бог, и Препрославлен.

Ии

Сладостем телесным приклонихся всеокаянно, и поработихся весьма страстным изобретением, и странен бых от тебе человеколюбче. ныне же зову блуднаго гласом: согреших Христе, не презри мене, яко един милостив.

Взываю, согреших, никакоже воззрети дерзая на высоту Небесную всецарю, яко в безумии един тя прогневах, отвергся твоих повелений: темже яко един благий, не отвержи мене от твоего лица.

Апостол, Господи, и пророк, и преподобных, и честных мученик, и праведных мольбами прости ми вся, яже согреших, прогневав Христе благодать твою: яко да песнословлю тя во вся веки.

Богородичен: Херувим явльшися, и серафим Богородице, и всех светлейшая Небесных воинств, с сими умоли, егоже воплотила еси Божественное слово всенепорочная, безначальнаго отца, яко да благ вечнующих вси сподобимся.

Ии

Побеждается, блаженнии, и отбегает яже прежде непостоянная дерзость ересей, воск же растаяваемый от лица огня, любодейное же всякое учение показуется, вашим приражающеся огнедохновенным вещанием.

Лживых убо уклонишася еллинских буесловий, увещание же томительство еже в человецех едино избраша: под нимже истину сии трие утвердивше, сице весь сонм

верных побеждают словесы, и увещевают.

Молчашии и зовущии, видимии же и слышимии, добродетели и мудрости Богголаголивии столпы быша, делом и словом вопити повелевающе: благословен Бог отец наших.

Богородичен: **В тя, Дево, вселися, и по рождестве Деву остави, иже устрояяй стихии, и претворяяй естества, якоже хочет, Богородительнице Марие. к немуже вопием с тобою, всенепорочная: благословен Бог отец наших.**

Катавасиа: Тебе во огни оросившаго отроки Богословившия, и в Деву нетленну всельшагося, Бога слова поим, благочестно поюще: благословен Бог отец наших.

Песнь 8

Ирмос: Пещь иногда огненная в Вавилоне действия разделяше, Божиим велением халдеи опаляющая, верныя же орошающая, поющая: благословите вся дела Господня, Господа.

Кровию Твоею, Христе, очервлено плоти Твоя зряще одеяние, трепетом ужасухся многому Твоему долготерпению ангельстии чини, зовуще: благословите вся дела Господня, Господа.

Ты мое смертное одеял еси, Щедре, в безсмертие востанием Твоим. Темже веселящися благодарственно воспевают Тя избранныи людие, Христе, зовуще Тебе: пожерта бысть воистинну смерть победою.

Богородичен: **Ты, Иже Отцу неразлучнаго, во утробе богомужно поживша безсеменно зачала еси, и неизреченно родила еси, Богородительнице Пречистая: темже Тя спасение всех нас свемы.**

Ин

Виден бысть на земли Тобою, и с человеки поживе, Иже благостию несравненный и силою, Емуже поюще вси вернии зовем: осуществованная да поет Господа вся тварь, и превозносит во вся веки.

Воистинну Тя, Чистую проповедающе, славим Богородицу: Ты бо едина родила еси от Троицы воплощенна, Емуже со Отцем и Духом вси поем: да поет Господа вся тварь, и превозносит во вся веки.

Ин

Сшедый на землю спасти мир, вольною нищетою за милосердие многое, обнищавшаго мя ныне от всякаго благодеяния, яко милостивый, спаси.

От твоих заповедей удалився, поработихся всеокаянно лестцу: обращающагося же ныне, яко блуднаго древле припадающа тебе, приими преНебесный отче.

Тлетворными помышленьми объемся омрачихся, и от тебе удалихся, весь вне себе быв щедре. темже в покаянии припадающа тебе спаси.

Богородичен: **Богородительнице чистая, низверженных исправление едина, исправи и мене всякими грехами сокрушеннаго всего и смиреннаго.**

Ин

Разумеваем благочестно, и прославляем единочестно, едино естество безмерно-мощную, единицу же и Троицу, вся сия словесы правящую лучшими: тако бо славити трие Богоноснии предаша, с нимиже покланяемся ей во веки.

Соединишася трие Богопроповедницы, соединившии Троицу, и нераздельное во всех соблюдшии, Божественным естеством: едину от тоя восприяша нераздельную славу, в похваление едино созывающую превозносящия ю во веки.

Яже Бог соединив во единочестнем единении, похвалитель да не разлучает человек, но равны непщуй в техже дарованиях, равных и пеней песнопояй да сподобит: отроцы, благословите, священницы, воспойте, людие, превозносите во вся веки.

Богородичен: **Нас ради воплощение и страсти честныя, нас ради Бог с мертвыми бысть, смерти убо невкусен, яко страстей свободен, к плоти же смертней общением глаголемый и страсти причастия и смерти, с неюже превозносим Христа во веки.**

Хвалим, благословим, покланяемся Господеви, поюще и превозносяще во вся веки.

Катавасиа: Нестерпимому огню соединившемуся, Богочестия предстояще юноши, пламенем же невреждени, Божественную песнь пояху: благословите, вся дела Господня, Господа, и превознесите во вся веки.

Богородицу и Матерь Света в песнях возвеличим!

Песнь 9

Величит душа Моя Господа, и возрадовася дух Мой о Бозе, Спасе Моем.

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем! (То же повторяется по окончании каждого следующего стиха.)

Яко призре на смирение рабы Своея, се бо отныне ублажат Мя вси роди.

Яко сотвори Мне величие Сильный и, свято имя Его, и милость Его в роды родов боящимся Его.

Сотвори державу мышцею Своею, расточи гордыя мыслию сердца их.

Низложи сильныя со престол, и вознесе смиренныя; алчущия исполни благ и богатыя отпусти тщи.

Восприят Израиля, отрока Своего, помянути милости, якоже глагола ко отцем нашим, Аврааму и семени его даже до века.

Ирмос: Безначальна Родителя Сын, Бог и Господь, воплощься от Девы, нам явися, омраченная просветити, собрати расточенная, тем Всепетую Богородицу величаем.

Яко в раи насаждено на лобнем, Спасе, требогатое древо Твоего пречистаго Креста, кровию и водою Божественною, яко от источника Божественнаго, ребра Твоего, Христе, напояемо, живот нам прозябло есть.

Низложил еси сильныя, распныйся, Всесильне, и еже низу лежащее во адове твердыни, естество человеческое вознес, на Отчем посадил еси престоле. С Нимже Тебе грядущу покланяющесе, величаем.

Троичен: Единицу Тричисленную, Троицу Единосущную православно поюще вернии, славим: непресекомо Пребожественное Естество, трисветлую, невечернюю зарю, Едину нетленную нам свет возсиявшую.

Ии

Жезл крепости дадеся естеству тленному, Слово Божие во утробе Твоей, Чистая: и сие воскреси, до ада поползшееся. Темже Тя, Всечистая, яко Богородицу, величаем.

Юже изволил еси, Владыко, прими милостивно Молитвенницу, Матерь Твою, о нас, и Твоя благи всяческая исполняется: да Тя вси, яко Благодетеля, величаем.

Ии

Виждь Христе печаль сердца, виждь мое обращение, виждь слезы спасе, и не презри мене: но обыми паки благоутробия ради, множеству спасаемых пречистая, яко да пою благодарно милости твоя.

Яко разбойник вопию: помяни мя, яко мытарь умилился, бию в перси, и зову ныне: очисти, якоже блуднаго прими мя всещедрый, от всех зол моих всецарю: яко да пою твое крайнее низхождение.

Воздохни ныне душе моя всеокаянная, и возопий Христу: мене ради волею обнищавый Господи, обнищавшаго мя от всякаго благодаяния, добрых богатством яко благий и многомилостивый един обогати мя.

Богородицен: Светлыми молитвами твоими Дево, мысленная моя очеса омраченная злобою, просвети, молюся, и к путем покаяния введи мя: яко да должно тя песнословлю, паче слова слово воплотившую.

Се ваше делание и паства, за юже величайшия болезни претерпесте, во едино сошедшеся: купно же три вы соприемше, общую имать похвалу ваше сладчайшее соединение.

Не обоюдоострый мечь, благодать, но треострый на (с. 649) ратников тоя предлагает: един Небокованен мечь тремя крепостьми изошрен, присно поборствуяй по трисиянном едином Божестве.

Возвысися троичная добродетель, и всяческая славы исполни, иную лучу нам возсиявши трисветлу, яко свое осияние, Небесныя тайноводители, имиже на Божественное оныя видение, благочестующе наставляемся.

Богородичен: Сына Бога живаго мудрых учителей верх пропева, твоего Сына, от откровения Отча, не от плоти и крове сие тайноуведав, Мати Божия. темже ты и Деву прославив, Матерь и Богородицу возвеличи.

Катавасиа: В законе сени и писаний образ видим, вернии, всяк мужеский пол, ложесна разверзая, свят Богу, тем перворожденное слово, Отца безначальна, Сына первородящая Материю неискусомужно, величаем.

Малая ектения.

Паки и паки миром Господу помолимся...

Свят Господь Бог наш! — Яко свят Господь Бог наш. — Над всеми людьми Бог наш.

Ексапостиларий 2-й:

Камень узревша отвален, мироносицы радовахуся, видеша бо юношу сидяща во гробе, и той тем рече: се Христос востал есть, рцйте с Петром учеником: на гору приспейте Галилейскую, тамо вам явится, якоже предрече другом.

Слава, Светилен святителей

Три светозарныя светильники, паче солнечных лучь, от светоначальныя Троицы, и трисолнечныя единицы, преестественно смешены, Богоносныя восхвалим отцы.

И ныне, Триоди:

Богатство, еже ми дал еси, благодати, окаянный отшед, непотребно зле иждих, спасе, блудно пожив, демоном льстивно расточих. темже мя обращающася, якоже блуднаго приими, отче щедрый, и спаси.

псалом 150-й

Глас 2. Всякое дыхание да хвалит Господа! — Всякое дыхание да хвалит Господа!

(псалмы 150, 148-й, 149-й):

На хвалитех стихиры воскресны, глас 2:

Хвалите Господа с небес, хвалите Его в вышних. Тебе подобает песнь Богу.

Хвалите Его вси ангели Его, хвалите Его вся силы Его. Тебе подобает песнь Богу.

Стих: Сотворити в них суд написан: слава сия будет всем преподобным Его.

Всякое дыхание и вся тварь Тя славит, Господи, яко Крестом смерть упразднил еси, да покажеша людям, еже из мертвых Твое Воскресение, яко Един Человеколюбец.

Стих: Хвалите Бога во святых Его, хвалите Его во утвержении силы Его.

Да рекут иудее, како воины погубиша стрегущии Царя; почто бо камень не сохрани Камене жизни Или Погребеннаго да дадут, или Воскресшему да поклонятся, глаголюще с нами: слава множеству щедрот Твоих, Спасе наш, слава Тебе.

Стих: Хвалите Его на силах Его, хвалите Его по множеству величества Его.

Радуйтеся людие и веселитесь, Ангел седяй на камени гробнем, той нам благовести, рек: Христос воскресе из мертвых, Спас мира, и исполни всяческая благоухания: радуйтеся людие и веселитесь.

Стих: Хвалите Его во гласе трубнем, хвалите Его во псалтири и гуслех.

Ангел убо еже радуйся, прежде Твоего зачатия, Господи, Благодатней принесе: Ангел же камень славнаго Твоего гроба в Твое Воскресение отвали: ов убо в печали

место, веселия образы возвещая: сей же в смерти место, Владыку Жизнодавца проповедуя нам, темже вопием Ти: Благодетелю всех, Господи, слава Тебе.

Святителей глас 5

Стих: Хвалите Его в тимпане и лице, хвалите Его во струнах и органе.

Радуйся, святителей троица, церкви великая забрала, столпи благочестия, верных утверждение, еретичествующих низпадение, Христовы упасшии люди Божественными учении, и различными добродетельми воспитавшии, благодати ясни проповедницы, законы произложившии Христову исполнению, вожди к вышним, райстии входы, Христа умолиште низпослати душам нашим велию милость.

Стих: Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Радуйся, святителей троица, Небошественнии земнии ангели, мира спасение, человеков радость, и вселенная учителя, слова поборницы, врачеве премудрии недугов душевных и телесных, приснотекущая реки Духовныя, словесы напаяющи земное все лице, Богословнии степени, златослови Божественнии, Христа умолиште низпослати душам нашим велию милость.

Стих: Восхваляются преподобнии во славе, и возрадуются на ложах своих.

Радуйся, святителей троица, земныя тверди солнца, лучи и светила от трисолнечнаго озарения, помраченных прозрение, цветы благовоннии рая краснейшии, Богослове, мудрый же василие, златоусте, дщицы Духа, скрижали Богоначертанныя, сосцы источающи спасения млеко, мудрости украшение, Христа умолиште душам нашим даровати велию милость.

Глас 5

Стих: Священницы твои облечутся в правду, и преподобнии твои возрадуются.

Вострубим трубою песней, да ликовствуем празднственная, и взыграем радующаяся в пречестное торжество учителей наших. Святителие и люди да стекутся, и воспещут в песнях: яко учений источившия реки превеликия три, доброточныя присноживотныя Духа, пастырие и учителя, пречестныя Троицы трегубыя священно-таинники, сошедшеся да восхвалим: философи, мудрыя: иереи, пастыри: грешницы, предстатели: нищии, обогатители: сущии в скорбех, утешители: путницы, спутешественники: иже в мори, кормчии, и вси иже везде тепле предваряющия, Божественныя архиерархи похваляюще тако рцем: пресвятии учителя, потщитесь изъяти верныя от житейских соблазнов, и избавити вечных мук молитвами вашими.

Слава, Триоди, глас 6

Отче благий, удалихся от тебе, не остави мене, ниже непотребна покажи царствия твоего: враг вселукавый обнажи мя и взят мое богатство, душевная дарования блудно расточих. востав убо обращайся к тебе вопию: сотвори мя яко единого от наемник твоих: мене ради на Кресте пречистей твои руце прострый, да лютаго зверя исхитиши мя, и в первую одежду облечеши мя, яко един многомилостив.

И ныне, глас 2

Преблагословенна еси Богородице Дево, воплощшим бо ся из тебе ад пленися, адам возвася, клятва потребися, ева свободися, смерть умертвися, и мы ожихом. тем воспевающе вопием: благословен Христос Бог благоволивый тако, слава тебе.

Слава Тебе, показавшему нам свет!

Великое славословие

Слава в вышних Богу, и на земли мир, в человецех благоволение. Хвалим Тя, благословим Тя, кланяемтся, славословим Тя, благодарим Тя великия ради славы Твоя.

Господи Царю Небесный Боже, Отче Вседержителю, Господи Сыне Единородный,

Иисусе Христе, и Святыи Душе. Господи Боже, Агнче Божий, Сыне Отець, вземляи грехи мира, помилуй нас.

Вземляи грехи мира, приими молитву нашу. Седяи одесную Отца, помилуй нас. Яко Ты еси Един Свят; Ты еси Един Господь, Иисус Христос, в славу Бога Отца, аминь.

На всяк день благословлю Тя и восхваляю имя Твое во веки, и в век века. Сподоби, Господи, в день сей без греха сохранитися нам!

Благословен еси, Господи Боже отец наших, и хвально и прославлено имя Твое во веки, аминь.

Буди, Господи, милость Твоя на нас, якоже уповахом на Тя.

Благословен еси, Господи, научи мя оправданием Твоим (трижды).

Господи! прибежище был еси нам в род и род. Аз рех: Господи! помилуй мя, исцели душу мою, яко согреших Тебе.

Господи! к Тебе прибегах: научи мя творити волю Твою, яко Ты еси Бог мой, яко у Тебе источник живота, во свете Твоем узрим свет. Пробави милость Твою ведущим Тя!

Святыи Боже, Святыи Крепкий, Святыи Безсмертныи, помилуй нас! (трижды).

Слава Отцу и Сыну и Святому Духу, и ныне и присно и во веки веков, аминь.

Святыи Безсмертныи, помилуй нас. Святыи Боже, Святыи Крепкий, Святыи Безсмертныи, помилуй нас!

Тропарь воскресный

Воскрес из гроба и узы растерзал еси ада, разрушил еси осуждение смерти, Господи, вся от сетей врага избавивый; явивый же Себе апостолом Твоим, послал еси я на проповедь, и теми мир Твой подал еси вселенней, Едине Многомилостиве.

Сугубая ектения.

Помилуй нас, Боже, по велицей милости Твоей, молим Ти ся, услыши и помилуй!..

Просительная ектения.

Исполним утреннюю молитву нашу Господеви...

Премудрость!

Благослови!

Сый благословен, Христос, Бог наш, всегда, ныне и присно и во веки веков.

Аминь.

Утверди, Боже, святую православную веру, православных христиан во век века!

Пресвятая Богородице, спаси нас!

Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем!

Слава Тебе, Христе Боже, Упование наше, слава Тебе!

Слава Отцу и Сыну и Святому Духу, и ныне и присно и во веки веков, аминь. Господи, помилуй, Господи, помилуй, Господи, помилуй. Благослови.

Воскресый из мертвых, Христос, истинный Бог наш, молитвами Пречистыя Своея Матере, святых славных и всехвальных апостол, (имена святых храма и дня), святых праведных богоотец Иоакима и Анны и всех святых помилует и спасет нас, яко Благ и Человеколюбец.

Великаго Господина и Отца нашего Кирилла, Святейшаго Патриарха Московскаго и всея Руси и Господина нашего Высокопреосвященнейшаго Ювеналия, Митрополита Крутицкого и Коломенского, Богохранимую страну нашу Российскую, настоятеля, братию и прихожан святаго храма сего и вся православныя Христианы, Господи, сохрани их на многая лета.

На 1 часе поется кондак "Взбранной Воеводе" или празднику.